

## MØTEREFERAT FRÅ MØTET I STYRINGSGRUPPA FOR EVENTUEL OMORGANISERING AV KOMMUNEREVISJONEN I SOGN & FJORDANE

Møtedato: **14. februar 2017**

Møtestad: **Thon Hotel, Skei**

Møtetidspunkt: **kl. 10:00 - 15:00**

Møteleiar: **Trygve Jacobsen, KRYSS Revisjon**

Sekretær/ referent: **Terje Førde, KRYSS Revisjon**

Desse møtte:

<b>Sogn og Fjordane Revisjon IKS</b>	<b>Styreleiar Arne Hovland</b>
	<b>Styremedlem Ivar A. Slinde</b>
	<b>Tilsettrepresentant Marit Haram Vannes</b>
	<b>Revisjonssjef Marianne Vara</b>

<b>Kommunerevisjonen i Nordfjord</b>	<b>Styreleiar Rune Myklebust</b>
	<b>Nestleiar Ole Reinhardt Bugjerde</b>
	<b>Tilsettrepresentant Torill Monsen</b>
	<b>Revisjonssjef Markvard Sunde</b>

<b>Kommunerevisjonen i Ytre Sogn og Sunnfjord (KRYSS Revisjon)</b>	<b>Styreleiar Trygve Jacobsen</b>
	<b>Nestleiar Jorunn Ringstad</b>
	<b>Styremedlem Ingvar Torsvik Myrvollen</b>
	<b>Tilsettrepresentant Asgeir Tveit</b>
	<b>Revisjonssjef Terje Førde</b>

Innkalling til møtet var utsendt pr. e-post, den 3.2.2017, vedlagt:

- **Agenda for møtet (det var sett av tid til lunsj frå kl. 12:00)**
- **Arbeidsgruppa sin «Rapport om samanslåing av dei tre interkommunale revisjonseiningane i Sogn og Fjordane til ei revisjonseining»**

Det var ingen merknader til innkallinga.

Saklista vart godkjend slik den låg føre.

*Det var enkel servering i foajeen før møtestart.*

## **Sak: Rapport om samanslåing av revisjonseiningane til ei ny felles fylkesdekkande revisjonseining**

*Først var det kort informasjon frå dei tre revisjonseiningane med informasjon om status i informasjonsutvekslinga som har vore i dei tre revisjonseiningane sidan førre møte.*

*Arbeidsgruppa v/Terje Førde gjekk gjennom dei ulike kapitla i rapporten, supplert med inn-spel og kommentarar frå dei andre i arbeidsgruppa, Marianne Vara og Markvard Sunde. Det vart orientert om arbeidsgruppa sitt mandat og arbeidet med utgreiingsarbeidet.*

Dei møtande var aktive i diskusjonane kring kvart av kapitla i rapporten, der arbeidsgruppa fekk gode innspel til det vidare arbeidet.

Det kom innspel om at det i rapporten må vere med noko om:

- mediestrategi (som ein kom attende til i slutten av møtet)
- revisjonen og fylkesmannen sitt tilsynsansvar (vere skarpare)
- utfordringar kring digitalisering
- desentralisert struktur
- behovet for nærliek til revisor for den reviderte

Arbeidsgruppa fekk gode tilbakemeldingar på den måten rapporten er organisert på og det omfattande innhaldet. Samla sett vart det forholdsvis små justeringar som det kom innspel på under møtet.

Leiaren oppsummerte og viste til at det vil kome ei stortingsmelding som kan avklare ein del spørsmål kring ny kommunelov. Det planlagde møtet den 21.06.17 må flyttast til hausten (18.08.17), slik at arbeidsgruppa får høve til å innarbeide i rapporten noko av det som blir bestemt av Stortinget i juni 2017; i høve regionreforma, kommunereforma og ny kommunelov. Der vil det kanskje vere avklara kva den nye kommunelova kan opne for når det gjeld m.a. moglege organisasjonsformer for ei ny revisjonseining. Kommunelova kan opne for at ein har tre modellar å velje mellom; IKS etter Lov om interkommunale selskap, §27-samarbeid (etter kommunelova), eller ei organisering som samvirke-modell, organisert etter ny kommune-lov eller etter Lov om samvirkeføretak (utanfor kommunelova).

Samvirkemodellen opnar for at ei enklare styreform, med eller utan eigenkapitalinnskot, og at møtande kan ha med fullmakter frå andre i t.d. representantskapet (enklare å sikre toppstyring).

Arbeidsgruppa må ta med meir kring samvirkemodellen i den endelige rapporten. Det gjeld også for den nye samarbeidsforma ‘kommunalt oppgåvefellesskap’, som også bør utgriast i rapporten.

Det var ein generell diskusjon kring tal representantar i ein representantskap, m.a. at det kan vere vanskar med å samle alle dersom det er mange..

Det vart konkludert med at ein skal vente å sjå kva Stortinget gjer vedtak om både for det som gjeld regionreforma, kommunereforma og ny kommunelov.

*Lunsj vart avvikla frå kl. 12:15 til ca kl. 13:00.*

*Etter lunsj gjekk ein gjennom resten av kap. 5, med arbeidsgruppa sine oppsummeringar og tilrådingar, og etterpå dei siste kapitla i rapporten. Deretter kapittel 0, samandrag, og kapittel 1, mandat og vidare handsaming.*

## **Samandraget i kapittel 0**

Samandraget må reduserast ein del. Arbeidsgruppa ser nærmare på dette og innarbeider dette.

### **Informasjonsrunde**

Det må organiserast ei informasjonsrunde med alle eigarkommunane, der ein lagar ein felles/likelydande presentasjon. Styringsgruppa ønskjer å få tid i kommunestyra til å orientere om det pågående arbeidet. Presentasjonen lagast av arbeidsgruppa.

Presentasjonen vert lagt fram for kommunestyret/fylkestinget av revisjonssjef og styreleiar i kvar av eigarkommunane sine møter så snart som møta vert avvikla framover.

Siktemålet må vere å få ei tilbakemelding, om kommunen/fylkeskommunen er interessert i å vere med å etablere ei fylkesdekkande interkommunal revisjonseining og om ein skal jobbe vidare med dette prosjektet.

### **Pressemelding**

Parallelt med at presentasjonen vert lagt fram for det første kommunestyremøte (den kommunen som har kommunestyremøte først), skal det sendast ut ei pressemelding som er kortfatta og opplysnande for dei pågande prosessar for etablering av ein felles interkommunal revisjon i fylket. Arbeidsgruppa lagar til pressemeldinga.

### **Tekstleg del i samandraget**

Arbeidsgruppa sine justeringar i dei ulike kapitla, og den endelege tekstlege delen av dette, må gjenspeilast i samandraget, kortfatta og konsistent med det som er oppsummeringar og tilrådingar i kapitla i rapporten.

### **Vidare handsaming**

Til punkt 1.4 i kapittel 1, ‘vidare handsaming’, og tilsvarande i samandraget i kap. 0; må ta sikte på å handsame saka i alle kontrollutvala i løpet av hausten 2017, og helst med handsaming i kommunestyra/fylkestinget innan utgangen av året (fullført sakshandsaming via kontrollutvala der endeleg utgreiingsrapport følgjer saka).

Det arbeidet som skal gjennomførast med bl.a. utarbeiding av samarbeidsavtale/eigarskapsavtale og selskapsavtale/vedtekter m.m., og realitetshandsaming av desse sakene i kommunane sine kontrollutval og deltakar-/eigarkommunane sine kommunestyre/fylkesting må gjerast i løpet av 2018.

Skal ein kunne ivareta dei endringar som skjer i fylket kring kommunesamslåingar og regionreforma, samt endringane som kjem ved Stortinget sitt vedtak kring ny kommunelov, så må det i løpet av hausten 2018/våren 2019 etablerast eit eige interimsstyre. Eigarkommunane må velje sine representantar og interimsstyret som må få etablert selskapet i løpet av hausten 2019, slik at selskapet er operativt frå 01.01.2020.

Den tekstlege delen i rapporten vert å justere av arbeidsgruppa tilsvarande ovannemnde.

### Flytting av møte 21.06.

Med bakgrunn i dei diskusjonar, føringar og vedtak som styringsgruppa gjorde i møtet, vart det reist spørsmål om endring av møtedato for neste møte i styringsgruppa. Etter planen var det sett ein møtedato til 21.06.17. Styringsgruppa var samde om å flytte dette møtet til fredag den 18. august 2017. Møtet leggast til Thon Hotel, Skei, med møtestart kl. 10:00. Til dette møtet skal arbeidsgruppa legge fram endeleg utgreiingsrapport.

Skei/Førde, 14.02.17/16.02.17



Terje Førde

*Møtesekretær i møtet/  
Referent*